



Vestland fylkeskommune

## Planprogram regional plan for fornybar energi 2022-2035

Sogn regionråd er positiv til at det vert laga ein plan for fornybar energi i Vestland. Utkastet til planprogrammet verkar å vere godt forankra i anna planarbeid og i overordna føringar. Rådet er òg tilfreds med at planen skal ta omsyn til dei eksisterande planane på området, både dei frå Sogn og Fjordane og frå Hordaland.

### Val av plantema

Rådet støttar valet av plantema. Dei er såpass generelle at dei vil kunne ta opp i seg dei fleste problemstillingane som er aktuelle. Vi kjem likevel med framlegg om eit tema til:

*Framlegg om nytt plantema: Nasjonale rammevilkår*

Delar av fylket har eit monaleg overskot av fornybar energi og mykje kraftkrevjande industri. Rådet meiner difor det er naudsynt med eit eige plantema for nasjonale rammevilkår.

Vi har under omtalen av *Problemstillingar som er viktige* gått nærare inn på nokre aktuelle deltema vi meiner er viktige på alle dei fire plantema, med særleg vekt på nye tema.

### Kunnskapsgrunnlaget til dei enkelte fornybare energikjeldene

Rådet er samd i at det vert laga eit kunnskapsgrunnlag for alle dei aktuelle energiformene. Kunnskap på fylkesnivå bør ha prioritet, men vi ber om at det vert sett av tilstrekkeleg ressursar til at kunnskapen i størst mogeleg grad vert brote ned på region- og kommunenivå. Eit grunnlag på eit såpass detaljert nivå vil vere særns nyttig i det kommunale planarbeidet.

Havvind er i fyrste omgang berre aktuelt utafør fylkesgrensa. Det er likevel slik at både utbygging og drift vil kunne ha ringverknader på land gjennom t.d. utvikling av leverandørindustri, nettinfrastruktur. Havvind vert òg truleg omfatta av det generelle regelverket for vindkraft.

Rådet er samd i at kjernekraft strengt tatt ikkje er fornybar, men fossilfri energi. Det er likevel nyttig med eit oppdatert kunnskapsnivå her, med tanke på at det i framtida kan verte ei meir aktuell energikjelde i gjennomføringa av det grønne skiftet.

Med *Nasjonale rammevilkår* som eige plantema vert t.d. både energimeldinga og Hurdalsplattforma viktig. Vi treng meir kunnskap om nokre av dei problemstillingane som er omtalt under dette plantema.

### Problemstillingar som er viktige innan dei føreslegne plantema

*Nytt plantema: Nasjonale rammevilkår*

Kunnskapsgrunnlag: Omtale og analyse av dei nasjonale rammevilkåra for fornybar energi, både innafor vasskraft, vindkraft, havkraft, geotermisk, sol og grøn hydrogen/batteri.

Korleis skal fylket påverke desse vilkåra framover, t.d. innafor:

- *Regelverket for eigarskap, omsetning, produksjon og distribusjon av kraft*
- *Stimulere til bruk av denne komparative føremonen i kraftkrevjande industri og anna næringsutviklinga i områda der krafta vert produsert*
- *Sikre at fylket sit att med meir av verdiskapinga ved overføring av overskotskraft til andre delar av landet, t.d. gjennom prisutjamning, gunstigare nettleige, konsesjonsvilkår og liknande*

*Plantema: Fornybar energi i Vestland*

Rådet er samd i at det er viktig å auke kompetansen, både blant fylkeskommunen sine fagfolk og gjennom utdanning på alle nivå av den kommande generasjonen. I tillegg er det naturleg å vurdere om bransjen er godt organisert - både i produksjon og nett - og i kva grad det eventuelt er mogeleg å nytte den offentlege eigarskapen i nødvendige endringsprosessar.

*Plantema: Retningsliner for arealbruk for vindkraft og småkraftverk*

Rådet viser til framlegg til nytt plantema over. Det er ikkje berre arealbruken som er viktig for vindkraft og småkraftverk. Fylkeskommunen sitt arbeid med å påverke t.d. skattereglar, eigarskap, konsesjonshandsaming osv. må òg inn i planen.

*Plantema: Kraftsituasjonen i Vestland*

Kortreist kraft vil vera det mest miljøvenlege, føra til låg belastning av linjenettet og medverka til fylkeskommunens uttalte mål om å ta heile fylket i bruk.

**Medverknad i planarbeidet**

I tillegg til aktørar som er nemnde i *kap. 4 Medverknad* bør regionråda og dei interkommunale politiske råda ha ein naturleg plass.

Arbeidsgruppene må òg ha nokre eksterne deltakarar med høg kompetanse og/eller kjennskap til lokale og regionale tilhøve. Dei vil kunne bidra til å styrke kompetansen i fylkeskommunen.

**Anna som blir vurdert som viktige innspel i planarbeidet**

Planen bør omtale mineral og andre råvarer som er viktige innafor elektrifiseringa av samfunnet og det grønne skifte generelt og særleg kva rolle Vestland kan spele her.

Med helsing

Hilmar Høl  
leiar Sogn regionråd

*Brevet er elektronisk og er utan handskriven underskrift.*